

19/05/1998

Pakar Porim ke Sudan beri khidmat R&D

KUALA LUMPUR, Isnin - Kementerian Perusahaan Utama bercadang menghantar pakar dari Institut Penyelidikan Minyak Sawit Malaysia (Porim) membantu menjalankan penyelidikan dan pembangunan (R&D) terhadap kesesuaian menanam kelapa sawit di Sudan.

Timbalan Menterinya, Datuk Hishammuddin Tun Hussein, berkata kajian itu sudah dimulakan oleh Porim dan Universiti Antarabangsa Afrika, Sudan melalui usaha Menteri di Jabatan Perdana Menteri, Datuk Dr Abdul Hamid Othman.

Hishammuddin berkata, keputusan itu juga berikutan kementerian membenarkan Tabung Haji menghantar biji benih kepada Institut Penyelidikan Pengeluaran Minyak Kebangsaan (Nopri) di Universiti Gezira, Sudan.

"Saya turut menemui pegawai Nopri yang berkeyakinan tinggi dengan kemampuan projek ini.

Kementerian juga akan mengkaji kemungkinan menghantar tenaga pakar dari Porim bagi membantu penyelidikan itu," katanya dalam satu kenyataan dikeluarkan hari ini.

Menurutnya, Datuk Seri Dr Mahathir Mohamad bersetuju kajian itu diadakan ketika melawat Sudan, minggu lalu.

Hishammuddin yang turut menyertai rombongan Perdana Menteri berkata, pertemuan beliau dengan Menteri Industri Sudan, Badr-eddin Sulaiman, memberi penekanan berhubung perdagangan dua hala kedua-dua negara, khususnya kepada industri minyak kelapa sawit.

Usaha bagi mencapai hasrat perbincangan itu akan dilakukan bagi jangka masa pendek dan panjang.

(END)